



**Handwerker- und Gewerbeverein Murgenthal und Umgebung**  
www.hgv-murgenthal.ch info@hgv-murgenthal.ch

**GV: HGV 14. März 2019**

Jahresbericht des Präsidenten

(Es gilt das gesprochene Wort)

Wie schnöu Zyt vergoht, merkt me immer wenn e GV vor de Tör stoht. Eigentlich gshe ich me immer no als junge und früsche Präsident. Trotdäm isches scho mi 3. Johresbricht, also wahrschindlich doch nüm so jung und früsch.

Für mich isches es Johr mit vöu **Neuem** gsi.  
Me cha säge, **NEU** isch mis Motto vo däm Johr gsi.

Was nid **Neu** isch gsi:

De gschäftig Fruehlig.

Alli umliegende Gwärbvereine händ ihri GV's zwüsche März und Mai und ou Delegierteversammlig vom Aargauische Gwärbverband isch i dere Zyt.

I däm Vereinsjohr han ich wieder alli GV's, wo ich iglade bin gsi, ou bsuecht.

Das Programm gseht denn wie folgt us:

Am 07. März GV Rothrist  
Am 15. März üsi eget GV  
Am 22. März GV Brittnau  
Am 28. März GV Oftringen

Denn flachts chli ab:

Am 05. April GV Safenwil  
Am 24. April GV Zofingen  
Am 26. April Delegiertenversammlung Aargauischer Gewerbeverband.

Und zum Abschluss:

Am 09. Mai GV Aarburg

**Und ab hie vönd jetzt die viele Neue Sache ah:**

A de Delegierteversammlig vom Aargauische Gwärbverband vom 26. April bin ich zum **Neue** Bezirksverträter und somit ou als Vorstandsmitglied im AGV gewählt worde.

Mis Ziel i däm Amt isch d'zämearbeit bi de Gwärbvereine chöne z'fördere und bestehendi Ressource besser z'nutze. Us däm Grund traffe sich alli Präsidenten **Neu** zwöi mal im Jahr zunere Sitzig.



**Handwerker- und Gewerbeverein Murgenthal und Umgebung**  
www.hgv-murgenthal.ch info@hgv-murgenthal.ch

Wiiter isches mit ere wiitere **Neuheit** gange:

Am 28. Mai händ mir üs im Rahme vo üsere alljährliche Jugendförderig bi de Hornusser in Balzenwil troffe. Mir händ dasmal nid nume eifach e Check übergäh, sondern händ die Übergab grad miteme Plauschhornusse chöne verbinde. Für fasch alli isch das öppis ganz **neus** gsi und me het schnäll gmerkt, dass das Hornusse gar nid so eifach isch.

Am 21. Juni isch den üse Alljährlich Grillobe agstande.

Hie wet ich grad als erschts allne danke wo dä obe organisiert und mitgholfe händ.

S'einzige wo a däm Grillobe **NEU** isch gsi, isch das de Präsident gfählt het!

Ich han i dere Wuche bereits zwöi anderi Gwärbvereinsbedingti Sitzige gha und d'Geburt vo eusem Nachwuchs isch ou churz bevor gstande.

Und de Wäre mir scho bim schönschte und gröschte **NEU** vo däm Johr:

Am 25. Juni hets bir Sabrina und mir nomal Nachwuchs gäh.

Und do das Johr jo alles **Neu** mues si, het's ou nid eifach nume eis dörfe sii, Nei, es sind grad zwöi cho! A dere Stell wet ich mich nomal bi mim Vorstand bedanke für das tolle Geburtsgschänk.

Zom Abschluss vom Sommer denn wieder öppis alt bewährts:

De Präsidialtag vom Aargauische Gwärbeverband.

Obwohl, hie gits ou es **NEU**:

De Präsidialtag het ufem Hallwilersee stattgfunde mitere Rundfahrt ufem **NEUE** Schiff MS Delphin.

Aus Hebrstalass händ mir en Betriebsbesichtigung chöne organisiere.

Wahrschindlich warte jetzt scho alli druf was do **Neu** isch.

Es isch ganz eifach, die Betriebsbesichtigung het ir **NEUE** Halle vom Niklaus Baumann in Fulenbach statt gfunde.

Im Aschluss a die spannendi Besichtigung het üs d'Firma

Metallbaumann ou no en Wurst vom Grill offeriert. Für dä tolli Alass dank ich rächt hätzlich de Firma Metallbaumann.

De Herbscht wird immer abschloss mitde Zämekunft vo Gmeindrat und

Vorstand HGUV. Ou a dere Sitzig hets öppis **neus** gäh. I gebe zue, hie

hani ganz lang müesse überlege was a dere Sitzig set **neu** si, am

Schluss isches de aber ganz eifach gsi.

Mir händ s'erscht mal üsi **neui** Gmeindrötin Brigitte Odermatt dörfe begrüesse.



**Handwerker- und Gewerbeverein Murgenthal und Umgebung**  
www.hgv-murgenthal.ch info@hgv-murgenthal.ch

Für die Sitzig händ mir wie scho im Vorjahr üsi Mitglieder bätte, üs Theme für die Sitzig z'vorschloh. Ou das Jahr isch nid würllich viel cho. Üs schiint, als euch allne eifach z'guet geit, oder das Gmeind eifach alles Richtig macht. Mir wüsse alli, dass beides nid cha stimme. Darum bitt ich euch a dere Stell nomal, schicket üs euri Alige und Sörgeli, damit mir im Rahme vo dere Sitzig das mit de Gmeind chönd diskutiere.

Sobald de Herbst verbi isch, geits meischtens sehr schnäll und de isch Wiehnacht, heisst für Vorstand vom Gwärbverein, Stärneflicke.

Aber halt, ou das isch das Jahr **NEU!**

De Vorstand het das Jahr nid ei Stärn gflickt!

I de letschte Jahre händ mir sämtlichi Stärne uf **NEUI LED** umgrüset. Leider sind die nid so guet gsi wie erwartet. De Liferant vo de LED het schliesslich alli Stärne nomal **NEU** lo mache, so dass jetzt wieder alli i **NEUEM** glanz strahle.

A dere Stell wett ich de Gmeind Murgenthal hätzlich Danke.

Ohni Ihri grosszügigi finanzielli Unterstützig wärs nid möglich, all Jahr s'Dorf mit Stärne z'dekoriere.

Ab de Wiehnachte bis zu de erschte GV's wüirds denn immer chli ruhiger, ömu nach usse. Natürlich händ mir ou i dere Zyt Sitzige, aber s'Jahr startet meischtens erscht so richtig mit em Früehligsmarathon mit GV's. So bin ich bereits letscht Wucho in Rothrist i die diesjährige GV-Saison gstartet.

Im Vereinjahr 2018 händ mir im Vorstand total 4 Sitzige abghalt.

Zusätzlich zu dene Vorstandssitzige han ich no 4 Vorstandssitzige vom AGV und 2 Bezirkskonferenze mit de Präsidentinne und Präsidente vom Bezirk Zofinge gha. Da ich ou no im MUGA OK als Vizepräsident und Usstelligsarchitekt bin, han ich ou dört no 5 Sitzige gha.

Total sind das also 15 Sitzige.

Wie immer am Schluss, und das isch nid **Neu**:

Es hätzlichs Dankeschön an mini Vorstandskollege und Kolleginne.

Ohni euchi Mithilf, wüirds nid funktioniere.

**Vielen Dank**

De Präsident

Pascal Blum